

# Nuannaarnermit piuvutit

- Sydney Banks-ip' "Tunngaviit pingasut" pillugit saqqummiussaa

Jacob Rebien-imit

"All we are is peace, love, and wisdom,  
and the power to create the illusion that we are not."

- *Jack Pransky*

Sydney "Syd" Banks skotlandimioq/canadamioq inuup eqqarsartaasianut tunngatillugu aamma inuunitsinni qanoq misigisaqalersarnersugut pillugu 70-ikkunni arlalinnik paasisaqarsimavoq.

Ilaatigut paasilersimavaa nammineq eqqarsaateqartarnermigut ilungersuutigisarsimasani annilaanganeq, nuannaannginneq, ernumassuteqarneq imminullu naleqartinnginneq taamaallaat misigisarlugit.

Paasisaqarnerata inuunera allanngortilluinnarsimavaa ilinniarsimangitsutullu svejseritut qulartuunini, nikallungaqqajaasarnini qaangerlugit nunarsuarmi angalalersimavoq universitetini, parnaarussivinni, atuarfinni assigisaannilu isumasioqatigiissitsillunilu oqalugiartarluni.

Sydney Banks 2009-mi toqukkut qimaguppoq, toqunnginneranili paasisai ilaatigut tarnip pissusiinik ilisimasaqarnerup, tarnikkut nappaateqarnermik ilisimasaqarnerup sungiusaasarnerullu iluini atugaalersimapput ukiunilu makkunani sukkasuupilussuarmik nunarsuarmi tamarmi atugaaleriartorlutik.

Sydney Banks-ip paasisami qiterpiaanut taaguusiuppaa "The 3 Principles" (Tunngaviit pingasut) – amerlanertigut taaneqartartoq "The Principles" (Tunngaviit).

Tunngaviatigut inuit "eqqarsaatitik malillugit ingerlasut"-ut isigivai, eqqarsaatit tassaasut software hardwaritsinni (timitsinni) silarsuarmik paasinnittarnitsinnut misigisaqartarnitsinnullu tunngatillugit sunik tamanik aqutsisuusut, taamalu aamma inuunermik nuannerluinnartumik ajorluinnartumilluunniit misigisaqartarnitsinnut pingaaruteqarluinnartuusut.

Allatut oqaatigalugu; inuunermi atukkavut, soorlu aappariinnermi atukkavut, peqqissuserput, aningaasaqarnerput, suliffeqarnermi atukkavut, isikkuvut ilaalu ilanngullugit inuunermik misigisaqartarnitsinnut taamalu isummatsinnut pingaaruteqanngitsut, taakkuli pineqartut pillugit eqqarsaasersuutigisartakkavut pingaaruteqarluinnartut.

Imaanngitsoq asuli isumassarsiaammat imaluunniit periutsit piumassuserlu atorlugit anguneqarsinnaammat, pissutigaluguli avatangiisitta qanoq misigissuseqarnissarput aqussinnaanngimmassuk, tassa avatangiisitta (silarsuup) ilorpiattalu (misigissutsitta) akornanni toqqaannartumik atassuteqartoqanngilaq.

Inuunermi misigissutsivut tamarmik taamaallaat misigisavut (malugisavut) pillugit eqqarsaatitsinneersinnaapput, tassa allatut oqaatigalugu:

Eqqarsaativut misigisarpavut.

Eqqarsartaaserput taamaattuuvoq. Eqqarsartaatsivut misigissuseqanngillat, silaannakkoortanngillat eqqorlutalu aamma inuit allat misigissutsinik eqqarsartaatsitsinnut 'ikkusisinnaanngillat'.

"Misigissutsit radariannik" imaluunniit "misigissutsit qanganisarsiuuannik" soqanngilaq silarsuarmi misigissutsinik nassaarsinnaasunik.

Misigissutsit taamaallaat uagutsinniipput, tassa taamaalillutik matoqqasuupput.



Eqqarsartaatsitsinnik taamatut paasinninnerup tarnip pissusiisigut paasisinnaanngisavut tamaasa ilaatigut nassuiaatissarsitippai; Sooq sakkutuut assigiimmik misigisaqarsimasut tamarmik kingusinnerusukkut misigisapilluminnik kingunerlutsitsineq ajorpat? – Sooq

nakorsaaitit tarnikkut nappaatinut taama assigiinngitsigisumik sunniuteqartarpat aamma sooq nakorsaataasat ilaannikkut sunniuteqarluartarpat (Nakorsaammik eqqortumik tunineqarluta eqqarsaraangatta)? – Sooq sulisut tamarmik assigiimmik suliaqartut uippakajaalernerq ajorpat? Ilaalu ilanngullugit.

Tamanna aamma ulluinnaanerusuni pisartunut atatillugu atuuppoq:

Arpakkaangama nuannaalertarpunga (taamaallaat ilaannikkuunngitsaq)

Aqqusinermi biilertut arlaata qarlotarfigigaangama kamattarpunga (taamaallaat ilaannikkuunngitsaq)

Nalunaaquttap akunnerini marlunni pujortarsimanngikkaangama puffaqqajaasarpunga (taamaallaat ilaannikkuunngitsaq)

Aningaaserivimmi kontora minuseqqaleraangat ernumalertarpunga (taamaallaat ilaannikkuunngitsaq)

Il.il.

Misigisatta assigiinngitsutigut misigisarnerannut akissutissartaa allaniit pissarsiarisinnaangilarput, taamaallaat eqqarsaatitsinniit aamma eqqarsaativut imaaliallaannaq allanngortarput. Allatut oqaatigalugu inuunermi misigisavut ilutsinniit avammut anittarpavut avataaniillu uagutsinnut tunniunneqarsinnaanatik, naak inuit amerlanerit taamaattoqartarneranik qularuteqanngikkaluartut:

“Kamalersittarpaanga”, “Nuannaalersittarpaanga”, “Suliffinni ittorisama annilaangalersittarpaanga”, “Uikuma annilaangalersittarpaanga”, “Meeqqama tulluutsittarpaanga” il.il..

“Ok, paasinarpoq” ilaat oqassapput “Kisianni suut eqqarsaatigilissanerlugit tamatigut uanga aalajangerneq ajorpara silarsuarmilu misigisamma aalajangersimasunik eqqarsaateqartilerpannga taakku misigisarpakka, taamalu kingunera taamaaginnarluni?”. Aap taamatut misinnartarpoq, qanorli pisarnerput erseqqinnerusumik sammilaariartigu.

Ullup ingerlanerani eqqarsaaterpassuaqartarpugut amerlanerpaallu nammineq eqqarsaatigilersimallugit misigisimasarata.

Eqqarsaatit taakku amerlanerpaartaat uagutsinnut sunniuteqaratik takkullutillu peeruteqqittarput, ilaannikkooriarlutali pingaaruteqartutut isigisatsinnik sivisuumik

eqqarsaateqartarpugut aamma piffimmi eqqarsaatitsinnik piviusutut isiginninnsinni (“Nuannarivippaanga”, “Suleqatima qinngarivaanga”, “Pillualernavianngilanga”, “Imminut tatiginngilanga”, “Ungapajuk!” il.il.) eqqarsaat piviusunngortikkaangatsigu timitsinni eqqissiveerunnertut, nuannaarnertut, ernumanertut, nuannaanginnertut il.il. misigisarparput.

Eqqarsaat imminermini arlaannaannulluunniit pituttorsimasuusangilaq (amerlanertigut ilisimaarinagu) upperilernissaata tungaanut. Pissaaneqanngilaq aamma ilumoortutut imaluunniit pingaaruteqartutut isiginera pissutigalugu “eqeertinnikkaagatsigu” qanoq innitsinnut sunniuteqarneq ajorpoq.

Taamaamat eqqarsarsinnaavunga “Sussaq, illuinnarsiummik piseriarlunga aningaaserivik ujajaaffigissuara inuunermalu sinnera Brasiliami pilluataarlunga inuullunga”, amerlanerpaat taamatut eqqarsarsinnaapput (pimoorunnagu) eqqarsaalli imaaliinnaq peeruteqqittarpoq. Eqqarsaalli pimoorukkaanni - “Taamaaliullassuunga!!” – eqqarsaat uummartissavara taamalu pissangalerlunga, annilaangalerlunga, pissamaalerlunga imaluunniit arlaannik timikkut misigisaqarlunga.

Imaluunniit eqqarsaat “Nuannarineqarpallaanngilanga”; taama eqqarsaleraanni eqqarsaatigiinnarnagulu (ilumoorsoralugu) nammineerluni peeruteqqissooq. Eqqarsaalli upperigukku ingerlaannaq malugissavara, soorlu nuannaarunnaassaanga imaluunniit naanni iluaattumik misigisaqassaanga.

Uanilu pingaaruteqarpoq erseqqissaatigissallugu; Suut eqqarsaatigilissanerlugit nammineerluta aalajangersinnaanngilarput, tamatigulli 100 %-imik aalajangersinnaavarput eqqarsaatit sorliit “upperinerlutigit” taamalu misigalugit. Eqqarsaatitsinnik tamanik upperinnittariaqarata maluginiariarlutigu, raadiutut tunutsinni aallakaatitsisutut niaqutsinni nipi tusaajuagarput tusarnaaginnartutut eqqarsaatigigutsigu eqqarsaativut ingerlaannartumik peerukkiartulissapput. Taamaalinerani eqqarsaatit peqqarniitsut ilaannikkullu nuangitsunik misigisitsisartut ingerlaannaq qaangiuttarput.



Eqqarsaatit neqeroorutaapput pinngitsaaliissutaanatik.

Misigisatsinnut, oqaatsitsinnut tunngatillugu nipi ilutsinniittoq akissuteqartuartoq assigalugu sumulluunniit arlaannaataluunniit uppertilersinnaanngilaatit.

Illit 100 %-imik kiffaanngissuseqarfigivat eqqarsaat upperissanerlugu imaluunniit saneqqutsiinnarlugu.

“Ok, ajunngilaq” ilaat oqassapput “Nuannersumik eqqarsaannassuunga taava suna tamarmi ajussanngilaq, misilittareerparali aamma iluaqutaanngilaq!”

Naamik, eqqarsaatit allanngortinniarsaralugit iluaqutaavallaartanngilaq amerlanertigullu isumalunneruliinnartarpugut, tassa eqqarsaatit kusassakkat atorlugit immitsinnut “iluarsiniarsarigaangatta” eqqaasaratsigu (eqqarsalersaratta) inuunerput taamaatsillugu inuunerput pitsaanngitsoq, taamaalillutalu suli nuannaannginnerulersarluta. Matumanilu qitiusoq alla tassaavoq: Uumassusillit suulluunniit pileqqaarnerminnit peqqissuujuarnissamut piginnaasaqarput; naasut qaamarnup tungaanut naajartortarput, orpiup avalequtai kipineqarpata nutaanik naasoqassaaq, timitta virusi timitsinniittoq ingerlaannartumik akiornialertarpaa imaluunniit talerput napisimasoq mamisinniartarlugu. Eqqarsartaaserput aamma taamaattuuvoq (taamaattuunngikkuni eqqumiissaqaaq). Inuit tamarmik ajunngitsumik eqqarsartaaseqarlugit inunngortarput tamatumunngalu akornusiisinnaasutuaq tassaavoq sumilluunniit eqqarsarsinnaanitsinnut kiffaanngissuseqarnerput, soorlu eqqarsaatinik nuanniittunik eqqarsaateqartuarnissamut kiffaanngissuseqartugut. “Aqut iperarniariaraangatsigu” eqqarsaatinillu nuanniittunik

eqqarsaateqarunnaarluta ajunngitsumik tunngaveqarnitsinnut uteqqittarpugut, soorlu amitsinni ikeq passuttanngikkutsigu amerput nammineerluni mamisarluni aallartittartoq.

“Ok, kisiannimi” ilaat oqassapput “Talera kipineqarpat imaluunniit pulateriaarsummit toqunartortalipilussuarmit kiineqaruma timima nammineerluni suliarisinnaanngilai nakorsamillu ikiorneqanngikkuma toqussallunga?”

Aap, matumanilu Sydney Banks-ip paasisaani qitiusoq alla tassaavoq:

Eqqarsartaaserput timitsitulli tigussaasuunngilaq.

Eqqarsaativut ilisimaarinnissuserpullu nukiupput timitsinni sulisut, soorlu pinnguatut robotip sarfaatut assingusumik. Talitut napisinnaasutut imaluunniit ikitut itivallaartutut eqqarsartaaserput ajoqusersinnaanngilaq. Soorlu pinngussami sarfaq ajortissinnaanngitsaq. Ledningi kittorarsinnaavoq plastikkitaaluunniit napisinnaalluni, sarfaqaannassaaq imaluunniit sarfaarussimassaaq, tassa imminermini ajortissinnaanngilaq.

Ilisimaarinnittuartilluta “sarfaqartuassaagut” taamalu ajunngitsumik tunngaveqarluta eqqarsartaaserput atortuarlugu, ilaatigut eqqarsaaterpassuit nuanniittut tamanna takutittanngikkaluarat.

Inuup assersuutigalugu pitsaasunik eqqarsaasersornermigut imminut “iluarsiniarsarinani” nuanniitsunilli eqqarsaateqaannarnerata kinguneranik eqqarsartariaaseq imminermini ajunngitsumik eqqarsartariaaseqarnermut utertarpoq, tassa inunnguuseralugu “ajoqutinik iluarsiissutitsinnut” utertarpoq.

Allatut oqaatigalugu; aquut iperarlugu eqqarsaasersorunnaarniariartugut eqqarsartaaserput nammineerluni pissusissamisut ingerlalertarpoq. Tatsimi kaavikajaarunnaarutta maralluk nammineerluni kivissaaq imerlu mingoqanngitsunngoqqilluni.

Tullianut.

Tunngaviit pingasut taakku uterfigilaarlugit:

## 1. EQQARSAATIT

Inuit tamarmik eqqarsaateqartarput aamma qanoq eqqarsaateqarnitsinnut 100 %-imik aalajangiisuusarput pisuni suniluunniit misigisavut. Perumi nunalerisutut pigisaqanngitsuulluni sakialluummik nappaateqartuugaluaraanniluunniit, Hollywoodimi peqqinnartumik inuuneqarluni ingerlalluartumik assilitittartuugaluaraanniluunniit nuannersunik eqqarsaateqaruit ajoquteqassanngilatit, nuanniittunik eqqarsaateqaruit pinngitsoornak peqqilliussaait. Eqqarsaatit tassaapput inuunitsinnik assigiinngitsutigut takutitsisut, "tupinnartuata" maannakkorpiaq inuunerput nuannersuutittarpaa imaluunniit nuanniilluinnartuutittarlugu.

## 2. SIANISSUSEQ

Inuit tamarmik sianissuseqarput (imaluunniit uagut ilisimaarinnittuuvugut), "taanna" sunik tamanik misigisaqartoq, takusatsinnik paasinnittoq misigisatsinnillu maluginnittoq. Sianissuseq qanoq ittuunitsinnut tunngaviuvoq, inuunerput tamaat eqqummaarittuulluniluunniit nakkutiginnittuusoq tunngavimmigullu allanngunngisaannartoq. Oqaraangatta imaluunniit ilimasuuteqarluta eqqarsaraangatta "Uanga ...", taava sianissuserput saattarparput.

Atisavut, suliffivut, nipilersuutit nuannarisavut, upperisavut, ilaqqutavut allanngortissinnaavagut, napparsimasinnaallutaluunniit peqqissuusinnaavugut, pisuujullutaluunniit piitsuusinnaavugut, nuannaarlutaluunniit nuanniilliorsinnaavugut, tamakkuli tunuanni tunngaviujuannarpoq "Uanga uangaavunga"-mik misigisarneq pissutsinit allanit tamanit allanngortinneqarsinnaanngitsoq.

Matumanilu pingaaruteqartoq tassaavoq; "Uanga"-p pingaarutaanik ilisimaarineq eqqarsaatitsinnut assersuunneqarsinnaanngilaq, tassaavorli eqqarsaatitsinnut nakkutiginnittuullunilu tusarnaartoq.



Eqqarsaatit  
tassaangillat illit

Inuunermi misigisavut eqqarsaammik upperinnilernitsinnik (sianissuseq) aallaaveqartarput. Eqqarsaat eqqarsaatigiinnaleraangatsigu ilutsinnilu arlaannit oqartoqarpat - "Puff!" taava silarsuami misigisarput piviusunngussaaq.

Akerlianik eqqarsaat eqqarsaatigiinnarnagu nipi ilutsinniittoq soqutiginnikkutsigu eqqarsaat inuunitsinnut, isumagissaartarnitsinnut misigissutsitsinnullu sunniuteqarneq ajorpoq.

Ima ingerlariaaseqarpoq:

"Uanga" (Sianissuseq) + eqqarsaat = misigissuseq inuunermilu misigisaq

Tassa ass. imaappoq:

"Uanga" (Sianissuseq) + eqqarsaat nuanniittoq = nuannaarunnaarlungalu  
nanertisimalissaanga

"Uanga" (Sianissuseq) + eqqarsaat nuannersoq = nuannaalissaanga, neriullualissaanga

"Uanga" (Sianissuseq) + eqqarsaat ernumanartoq = ernumalissaanga  
annilaangalerlungalu

"Uanga" (Sianissuseq) + eqqarsaat kamannartoq = kamalissaanga, peqqarniittumik  
kamajallissaanga

Il.il.

Taama pisoqartarnera amerlasuutigut uisorernerinnaalluunniip ingerlanerani pisarpoq: eqqarsaateqalerpugut, ilumoortuusorivarput taamalu "BAM!" misigissutsitut timitsinni ingerlaannaq malugalugu.

Pisoq sukkasangaarmat susutut misinnartarpoq taamalu uagut nammineq iliuuseqarnitsinnit (ilisimaarinagu) aallaaveqartoq takunngitsoortarlutigu.

Taamaalilluta paatsiveeruttarpugut pisunillu eqqugaasutut misigisarluta, tassa misigissutsimut nalaatatsinnut attuumassuteqanngivissutut misigisaratta. Misigisarmi nalaatarput nammineerluta pilersissimannikkutsigu avatitsinneersimassaaq, silarsuarneersimassaaq, piviusuusimassaaq: "Kamatsilerpaanga", "Pakatsisittarpaanga", 'Kiserliortuuvunga" eqqarsaallu eqqortuusutut aalajangiunniaraangatsigu taava, "BAM!", eqqarsaatigiinnalersarparput misigisarlutalu – Tassa illit inuunerit.

### 3. INUNNGUUSERALUGU PEQQISSUSEQ

Inuit tamarmik ajunngitsumik eqqarsartaaseqarlutik inunngortarput. Inuup eqqarsartaasiata uumassusillit allat tamaasa assigalugit piginnaaneqarfigaa ajunngitsumik eqqarsartaaseqarnermik aallaavimmut uteqqissinnaaneq.

Peqatigitillugu tamatta kiffaangissuseqarluta inunngortuuvugut, tamanna atortarparput namminerlu kisiivitta aalajangertarparput eqqarsaatit sorliit upperissanerlugit taamalu inuunerput misigisarlugu. Allatut oqaatigalugu tunngaviatigut ajunngitsumik eqqarsartaaserput avaqqutissallugu kiffaangissuseqarpugut, soorlu eqqarsaatit uagutsinnik nuannaarunnaartitsisartut, kamalersitsisartut, ernumalersitsisartut il.il. eqqarsaatigiinnarnerisigut.

Tarniluuteqaraangatta ajoqusersimanerput imaluunniit annaasaqarsimanerput pissutaaneq ajorput, pissutaasarporli inunnguuseralugu ajunngitsumik eqqarsartaaseqarnerput avaqqullugu eqqarsaateqartarnerput (pissuusutiginagu, tassa ingerlariaasia ilisimasaqarfiginnginnatsigu).

Allatut oqaatigalugu amigaateqarnerput pissutigalugu nuanniilliorneq ajorpugut, nuanniilliorpugulli nuanniitorpassuarnik eqqarsaasorsoraangatta.

Qamani eqqissisimaneq, inoorusussuseqarneq nuannaarnerlu pinngitsoorata piginnaasaqarfigisussaangilavut imaluunniit piginnaasaqarfigilerniarlugit sungiusarsinnaangilavut, taakkunangami piusuugavit – Nuannaarnermit piuvutit.

Inuppassuit tarniluuteqartarnerat pillugu paatsuungasoqartarneranut aamma tarniluuteqalartarnerannut pissutaasoq pillugu "isiginnaartitsivimmi isiginnaartitsisut takutitsiffiata tunuani" susoqarneranik oqaluttuunneqarsimannginerput pissutaavoq. Avatangiiserput misigisinnaangikkipput (misigisinnaanagu malugisinnaagipput),

avatangiiserpulli pillugu eqqarsaativut taamaallaat misigisinnaagivut aamma eqqarsaatit nuanniittut tunuanni ajunngitsumik eqqarsartaaseqarnerput tamatigut uterfigisinnaagipput. Seqineq tarrinngisaannarpoq, naak ilaatigooriarluni nuissat taartuinnaat tarreqqatilluinnartaraluaat.

Misigissutsitta qanoq ingerlasarnerat ilisimangittuarutsigu ajortoqarneranik, arlaannik ajortittoqarsimaneranik, qaamanermik qamitsisoqarsimaneranik inerniliijuartassaagut.

Pissutaasinnaasunik ujaasilluta siullermik avatangiisitsinnut qiviartarpugut; "suliffinniuna ittorisara", "aappaqarneraana", "isikkoraana" ajortunik misigisaqarninnut pissutaasoq misigisavullu aaqqinniarlugit avatangiiserput allangortinniartarparput.

Misigisimaguttali nutaamik suliffittaarnerput, aningaasaateqarnerulernerput imaluunniit nutaamik aappartaarnerput iluaqutaanngitsoq imaluunniit assersuutigalugu toqusoqarneratigut, soraarsitaanitsigut, akiliisinnaajunnaarnertigut imaluunniit avinnitsigut avatangiisitsinnik allanguisinnaannginnerput pissutigalugu qanoq iliuuseqarsinnaanata misigisimagutta immitsinnut qiviartarpugut inerniliillutalu ilutsinni ajortittoqarsimasoq, arlaatigut ajoquteqartugut, tassami ajorluinnartutut misigisimasaratta (naalliuttussanngorluta pinngortitaannginnatta tamanna eqqunngitsutut pissusissamisunngitsutullu misigisarparput). "Hey, nuannaartariaqaraluarlunga nuannaanngilanga – arlaannik ajoquteqarsimassaanga?!"

Tamatuma kinguneranik nuanninngitsumik misigisimasarpugut, isumaqarluta misigisavut aqussinnaanagit pissusissamisoortuusorisatsinnillu marluinnarnik iliuuseqarsinnaalluta: misigisatta nuanniittup annikilliseriarnera, soorlu sulinerunikkut, ingasattajaarluni timersornikkut, imigassartornikkut, nakorsaatitornikkut, aningaasannanniarnikkut, atoqateqarnikkut, nerisassanik aqutsinikkut (neriniarnermik ajornartorsiuteqarneq) (nammineq ilaartukkit) ilutigalugu tarniluuterput qaangerniarlugu eqqarsaaterpassuaqartarpugut.

Eqqarsaasersorneruleriartortillutali ajorneruleriartortutut misigisimasarpugut.

Aniguiffissarsiortarpugut eqqarsaatilli aqqutigalugit aniguiffissaqartarata.

Avataanit isigalugu iluanngippasittutut isikkoqarsinnaavoq, tamannali

pissusissamisoorluinnartutut qisuariarneruvoq.


Inummi ajorluinnartumik misigissutsimigut atugaqaruni iluarseriaateqarsinnaasutullu neriuuteqanngikkuni inoorusukkunnaassaaq. Atornerluinerup maannakkorpiaq inuuneq atoruminarnerulersittarpaa (eqqarsaatit nuanniittut ajoquteqarnitsinnut pissutaasut annikillissikkallarsinnaammagit) eqqarsaatillu kaavittuartut suli neriuuteqarnitsinnik takutitsisarput, takutittarpaat suli aniguiffissarsiortugut, suli periarfissaqartoq qaamanermut appakaateqqinnissatsinnut.

Atornerluineq eqqarsaatillu kaavittuartut umiartup imaani annanniapiloorneranut assersuunneqarsinnaapput. Inuuneq – qujanartumik! - tamaviaarnartarpoq. Iluarsinissamut periarfissaqanngikkaanni aamma pisut pitsaanerulernissaannik neriuuteqanngikkaanni tunniutiinnarnissaq kisinngoruttarpoq.

Ajoraluartumik taamatut eqqarsaasersorpallaartarneq ajornartorsiornitsinni piffissamik atuiffiginerpaasarpaput, tassa ilungersornitsinnut pissutaasoq aaqqiiffiginiarlugu neriuuteqarnitsinni. "Nuannaanngilanga, qanoq iliorsinnaavunga? Kiserliorpunga aliasullungalu, sapilerpunga, sooq taamatut misigisimassaanga? Sooq nuannaaginnarsinnaanngilanga? Suna tamarmi nuannersuugaluarami, maanna nuannerunnaarpoq, taamatut inoorusunngilanga..."

Taamatut eqqarsaasersuleraangatta tamatigut naatsinnik iluaalliulertarpugut, niaqorlulertarpugut, uippakajaalersarpugut, nikallungalersarpugut, sinissaaruttarpugut, kamalertarpugut il.il.. Taamatullu misigisaqaleraangatta piviusumik pisutut uppernarsaatissaqartittarpaput.

Niaqutsinni nipitut "eqqarsaataannaasoq" nalunngikkaluarparput. Timitsinnili iluaalliulerniariarluta eqqarsaaterput piviusunngortarpoq. Eqqarsaaterput avatitsinnut anikkutsigu piviusuumiit immikkkoortissinnaajunnaassavarput; "Eqqarsaataannaanngilaq, ilumut piviuvoq!!"



Misigisat piviusuusut  
misinnartarput  
eqqarsaataannaappulli 3D-  
usut

Aap ilumoorpoq, timitsinni iluaattumik misigisaqarnitsinnut tunngatillugu piviusuuvoq, tunngaviatigullu pissutaanngitsut sunniutigivaat, tassalu; eqqarsaatit.

Timitsinnilu misigisavut aqcutigalugit uppernarsisarpaput eqqarsaativut ajoraluartumik ilumoortut, taamaalillutalu ilungersorluta aaqqiissutissarsiulersarpugut eqqarsaativullu nuanninngeqqisut uteqattaarlugit eqqarsaatigiualersarlugit. Taamaaligaangatta tamatigut nuannaannginnerulerluta inuummarlunnerulersarpugut tamannalu unitsinneqanngippat tarniluuteqalerluta timitsigut ajoquteqalissaagut.

Qitiulluinnartoq tassaavoq inunnguuseralugu ajunngitsumik eqqarsartaaseqarnerput pinngitsoorata malittariaqannginneranik paasinnissimannginnerput.

Isumatsassimaneq, uippakajaarneq annilaanganerlu pissusissamisoortuunngillat atulersinnagit eqqarsaatigilluartaqakkavut. Ajornerpaaffitsinni ajorluinnartumik eqqarsaateqarnerput/misigissuseqarnerput eqqarsaasorsorluta anigorniarsarigutsigu assigiinnarpaa ikuallattoq benzinamik qaminniarsaralugu.

Inuk eqqarsaateqartanngitsoq (eqqarsaatinulluunniit tusarnaarneq ajortoq), isummamigut eqqissisimasoq ernumalernaviangilaq, tunniutiinnarnaviangilaq uippakajaaleraniluunniit, tassa taakku tamarmik eqqarsaatinit aallaaveqartarmata.

Kukkulluta tamanna killormoortutut isigisarpaput, iliuuseqanngikkutta, ajunnginnerulerniarluta arlaannik eqqarsaateqanngikkutta imaqanngitsutut kiserliortutullu misigisimassaagut nuanninngitsunillu eqqarsaateqalerluta.

Tassa nuanninngitsunik eqqarsaateqaraangatta soorlu tassa qaqqasiortartoq qaqqarsuarmi


ajornartorsiorluni salliarnap sinerpiaa kukimminik tigullugu annaniarsarisoq. Assoroorunnaarutta (eqqarsaasensorunnaarutta) misigissutsit nuanniingaaramik nassuiaruminaatsut samungarsuaq nakkarfigissavavut.

Eqqarsartaaserpummi allaanngilaq arsaq puttasartoq, nuanninngitsunik eqqarsaateqarnivut tamaasa aqerlutut oqimaatsigisorsuannngorsorisartagarput.

Inuup ajunngitsumik isumaqarluni ernumavallaarnerarpatigut eqqisseqqulaarlutalu imaluunniit imaaliallannerinnakkut nammineerluta paasilerutsigu nuanniippallaanik eqqarsaateqarpallaartugut taava tamanna paasinnilernitsinnut aallaaviusarpoq.

Tarnilulersimasoriguma (soorlu taamaalersimasunga nakorsara oqarpat), taava uanga tassaavunga qaqqasiortartoq "eqqissisimaalernissaralu" ajorluinnartumik isikkoqassaaq eqqarsartaatsinnullu ajunngitsumut akornusiisinnaalluni. Qaarsaq tigumminiarsarivara iperarukkulu samungarsuaq nakkassallunga.

Akerlianik tatiginnittuuguma imaluunniit eqqissisimagaangama ajunnginnerulertarlunga paasisimagukku taava uanga arsaavunga puttasartoq aqerlumit ammut nutsunneqarluni ajunaalersoq, ikiuutaasinnaasutuarlu tassaalluni aqerlup iperarnissaa.




Sydney Banks-ip paasisami timiminut sunniuteqartarnera nammineerluni misigisimavaa takusinnaasimavaalu inuit ukiorpassuarni tarniluuteqarsimasut, ulorianartunik nappaatillit imalluunniit inuunerminni peqqarniitsumik atugallit (soorlu inuunertik naallugu parnaarussaasimasut) tamarmik eqqarsartaatsimikkut qanoq ajoquteqanngitsigisut, tassami tarniluutertik eqqarsaatiminneersoq paasiniariaraangamikku suna tamarmi allanngortartoq takusinnaasimavaat.

Inuit eqqarsartaasertik pissutigalugu pisunit ajorluinnartunit namminneerlutik qaangiisinaanerannik paasinninneq tamanna tunissutitut pinngitsoorneqarsinnaanngitsutut isigivaa eqqarsartaaserlu taamaammat "anersaarsiortutut" imaluunniit "pitsaalluinnartutut" nassuiarlugu.

Ullumikkut ilinniartitsisut assigiinngitsut taakkuninnga suliaqaraangamik assigiinngitsutigut oqaatsinik atuisarput. Ilaasa eqqarsartaaserput "anersaarsiortutut" nassuiartarpaat, allalli taaginnartaraat eqqarsartaaseq imaluunniit nukik.

Oqaatsit atorineqartut tunngavimmikkut isumaqanngillat, Syd-illi paasisaani qitiusoq tassaavoq inunnut ataasiakkaanut sunniuteqassagunik inunnit ataasiakkaanit misigineqarlutillu paasineqartariaqarnerat. Tarniluutit "imminut salloqittarlutit" qaangerniarsarisinnaanngilat, soorlu "naluttuusaarsinnaanngitsutit". Minutsialunnguani puttaniarsinnaavutit pitsaasunilluunniit eqqarsaateqarniarsaralutit, piffissarli ungasinnerusoq eqqarsaatigalugu pissutsinik allanngortitsivallaarneq ajorpoq.

"Tunngaviit pingasut" periutsit sungiusarnerillu aqutigalugit arlaannik upperinnilernissaq imaluunniit nutaanik piginnaasaqalersinnaaneq ersersinngilaat, suunerput qanorlu ingerlanerput pillugit eqqaasissutaaginnarpoq, nammineq qanoq takunnissinnaaqqilersinnaaneq pillugu neqeroorutitalik. ☺



Ataatsimut isigalugit:

- Avatitta (malugisatta) iluttalu (misigisatta) akornanniipput eqqarsaativut.
- Suulluunniit avatitsinneersut misigissutsitsinnut eqqarsaativut aqqusaaqqaarnagit sunniuteqarsinnaangillat – toqqaannartumik atassuteqangillat.
- Eqqarsaativut taamaammat 100%-imik aalajangiisuusarput piviusunik nassuiaasiornissatsinnut taamalu inuunermik misigisaqarnitsinnut.
- Maannakkorpiaq misigisavut maannakkorpiaq eqqarsaatitsinneersuupput – kamannartunik eqqarsaateqarnitsinni eqqissisimasinnaangilagut aamma neriulluarnartunik eqqarsaateqarnitsinni nikallungasinnaangilagut.
- Eqqarsaat imminermini arlaannaannulluunniit pituttorsimasuusangilaq piviusutullu isigilinngikkutsigu imaluunniit eqqarsaatigiinnalinngikkutsigu ajoqutaasangilaq taamaalissappallu eqqarsaat piviusungussaaq misigisinnaalissavarpullu.
- Eqqarsaatit sorliit eqqarsaatigilissanerlugit nammineq aalajangertanngilarput, eqqarsaammilli piviusuusorinneriarluta eqqarsaatigiunnaaginnarsinnaanera kiffaangissuseriuaannarparput.
- Eqqarsaatit qarsupittuupput, tigussaasuunngillat aamma eqqarsaat nutaaq imaaliillaanaq takkuttuaannarpoq, soorlu nuissat ingerlaartut allanngorartuullu, tassa eqqarsaatigiinnalinngikkaangatsigit. Eqqarsaatigiinnaleraangatsigit eqqarsaatit (pitsaanerit) nutaat mattuttarpavut misinnartarlunilu misigisamik qaangiinaveerluni.
- Eqqarsaatigiunnaarutsigit piffissap ingerlanerani ajunngitsunik eqqarsaateqaqqittalissaagut, eqqarsariartaaserpummi (inuunillit allat assigalugit) imminermini iluarsiartortarpoq, inunnguuseralugu ajunngitsumik eqqarsartaaseqarnitsinnut uteqqittuaannarpoq.
- Qamuuna eqqissisimaneq, nuannaarneq asanninnerlu eqqarsartaatsitsinni



tungaviupput taakkunangalu piugatta annaaneqarsinnaangillat.

- 100%-imik ajoquteqanngilatit tamatumangalu ajoqusiinnaasutuaq imaluunniit annikilliliinnaasutuaq tassaavoq ajoquteqarnermik eqqarsaateqarnek – upperisannik eqqarsaateqarnek 😊.